

Minister Otmar Oduber a anuncia:

Ley di Parke Marino ta na Raad van Advies

ORANJESTAD (AAN) – Dialuna Gobierno a tene su prome conferencia di prensa semanal, na encargo di Minister Otmar Oduber, titular di Infraestructura y Medio Ambiente y di Minister Glenbert Croes, encarga cu e carteranan di Labor y Asunto Social.

Minister Otmar Oduber a hiba palabra na prome lugar, y hunto cune tabata tey tres funcionario di Departamentodi Naturaleza y Medio Ambiente, cu a haci un presentacion di nan website. E dignatario a indica cu comunidad por a tuma nota cu durante e ultimo lunanan hopi atencion a wordo dedica na e maneho integral di

nos medio ambiente y e nota cu a keda entrega y publica recientemente, y cu a wordo presenta tambe na New York, recientemente, durante e foro di Nacionnan Uni y ademas, na e Secretario di Estado di Hulanda, unda a combersa, negocia y discuti riba diferente punto cu tin den e rapport aki. Durante e conferencia di prensa DNM a haci un presentacion di e website informativo aki, pa nos comunidad. Den e mesun contexto di medio ambiente, Minister Otmar Oduber a informa cu na e momentonan aki, e ley di Parke Marino ta na Raad van Advies. E mandatario a señala cu Parke Marino



tabata un topico prome cu Parke Nacional Arikok mes a wordo institui. Pues, Parke Marino a keda un discusion cu tin mas di 30 aña ta andando, y

como minister anterior di Turismo, na añanan 2010-2011 e tabata tin e honor di por a traha y contribui na e desaroyo di un ley cu ta acapara un Parke Marino

pa Aruba, y durante e ultimo añanan DNM hunto cu otro partnernan a traha na un forma hopi fuerte riba esaki. E mandatario a expresa cu nan tur a duna un empuhe hopi fuerte tras di esaki y el a felicita y gradici henter e team, cu aworaki e ley ta na Raad van Advies. Minister Otmar Oduber ta spera cu ora e recess di Parlamento caba e ley menciona por bin bek y di e forma ey por publike oficialmente, y cuminsa cu e proceso di consulta hopi estrecho cu tur e usuarionan, y esnan cu ta bay haci uso di nos lama y e areanan cu ta bay wordo incorpora den e Parke Marino.